



客(海陸)／抒懷／☆☆★★

石榴花

三月，春天个日頭晒人一身燒暖、溫柔个東風吹人滿身鬆爽、各種花卉繆大地打扮到多姿多采，就算空氣也混雜等花香。恁好个天時，大家黏時繆冷天个愜悴掉忒，心情跔等春天開朗起來。

見在這時，係有人行在厝屋面前過，就會分個門脣一大鉢撇到像大腳盆恁大，開到淦淦看毋著葉仔个石榴花錫著，佢兜長下一頭欣賞、一頭嘴叮嘖嘖滾講：「還大盆！還靚！」平常無開花時毋打眼个樹仔，一到開花，斯像無人識个村姑，著(zhog)起華麗个新衫，黏時灰姑娘變公主，人看人愛。這鉢幾年前冬下人送个石榴花，一拿著時，係心肝肚緊胚，明年開个花會係佢最愛个白色無？也係淡雅个水紅色？還係粗俗个大紅色？等啊等、望啊望仔，春天來咧，尖尖个花苞也緊來緊大，最尾開出一樹濃濃个茄紅色石榴花來。雖然毋係佢最愛个白色，毋過，麼个東西大又多就係靚，所以這一樹茄紅還係靚到耐毋得。逐年隔壁鄰舍繆佢共樣，期待佢開花、愁慮佢謝忒，無想著一頭花樹繆大家个心拉恁近。

佢最先試著石榴花靚，就係細人仔時跔阿姆去陽明山寮，滿山滿路个石榴花，有白个、大紅个、水紅个、茄紅个，也有有斑點个、無斑點个，色目實在多，佢拉等阿姆个衫尾，在花園肚穿上穿下，目珠毋盼得瞞一下，仰有恁大个公園！仰有恁靚个花！到大咧又去過盡多擺，石榴花个靚毋識分佢失望過，難怪大詩人白居易特別愛佢，講佢係花中个西施。

石榴花好(hoˊ)種又靚，佢戴个新竹市斯用佢做市花，記得佢讀中學時，學校就種當多石榴花。一落校門，圓環肚高个係烏松，矮个就係石榴花，尤其在第一楨繆第二楨教室之間，還較係全部種石榴花。一到三月，佢兜像人湊好樣，用佢最靚个妝容繆佢兜通知：「春天來咧！春天來咧！」學校黏時就鬧熱起來。佢三年生个導師當好翕相，一到花開就繆大家渡去校園翕相，一隻隻十五、六歲个細阿妹仔，在石榴花脣留下青春年少个身影，笑容斯像石榴花恁燦爛。一瞞目，四、五十年過去咧，見看著相片，就像聽著佢兜留在石榴花下个笑聲繆低語，可惜同學早就無聯絡咧，正正係年年歲歲花相同、歲歲年年人不同啊！

人講：「春有百花秋有月，夏有涼風冬有雪，若無閒事掛心頭，就係人間好時節。」所以幸福實在盡簡單，春天時等著一場花開，就係幸福！

作者：張美容

☆詞彙學習☆

【石榴花】shag` liu fa`：杜鵑花。

【濃濃】ngiung ngiung：厚又多。

【嘴叮】zhoi` nen`：嘴裡。

【穿上穿下】chon` shong` chon` ha`：穿梭。

【胚】poi`：揣測。

【正正】zhin` zhin`：真的。

☆文法學習☆

【嘖嘖滾】zid` zid` gun`：「嘖嘖」是狀聲詞。形容咂嘴聲，表示讚嘆、驚奇。「AA 滾」的重疊式構詞一般多用於擬聲，並指聲音持續不斷，例如：風咻咻滾（風呼嘯著）、噉到哇哇滾（哇哇大哭）。相對於客家語的「AA 滾」，閩南語則以「AA 叫」的形式呈現。